



# Tir Yimym


www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



TAPAK 7

Prannoy-i anir India nung asayartem Taipei Open asayatsü

Greece nung rong mükepoka asürtem atema Pakistan nung mang

VOL. XX NO. 247 (ADOK 247) DIMAPUR SANGTENNÜ (TUESDAY)

AAMI (JUNE) 20 2023

₹ 5.00

## Naga Club-i NSF mendenpurtem aitsür

**Dimapur, June 19, 2023 (Agencies):** Naga Club (NC) züngsem Kuolachalie Seyie, par kinunger, pa indang kiojen mesüra züngsem kari danga lendong ajurura Naga Students' Federation (NSF) züngsem kari iba tebilemstüji abentsü ta Naga Club-i metetdaksü.

Taoba hopta NSF indang sangdong atema langzüba shidi ka nung Information & Publicity Cell, NC ajanga iba osang metetdaksü.

"June 13 nü NSF-i sangdong ka agütsüba nung Kuolachalie Seyie tenüng tetshia lir aser pai Naga Club (NC) o Nagaland nung alirtem tenüng nung ochi o jembiba aitsüogo. Pai pa nija atema masü saka NC president ka ama ochishia jembii" ta

Information & Publicity Cell-i ashi.

"NSF züngsem kari pa nija dak tenük yoka jembio. Pai NC indang Archives nung aliba putiotsü den putepa jembii saka pai Naga nung anisar ta NSF züngsemtemi aitsüogo. Anungji K Seyie mesüra par kinunger mesüra pa indang kiojen nmesüra NC züngsem kari dang masüba mapa kar ajurura K Tep aser Süpuni Philo nati tebilemstü khuret abentsü" ta Naga Club (NC)-i metetdaksüogo.

Naga Club (NC) indang ketdangpurtem ya inyakyim nung aliba shimer aser office ketdangsubaren tang aliba ketdangpurtem nem tashi agütsüogo ta parnokisa ashi.

## Coco-Doyang road nung gari tulutem mesenzütsü

**Dimapur, June 19, 2023 (TYO):** Coco-Doyang road (Doyang bridge nungi Kitsakita junction tashi) gari tulutem mesenzütsü atema Zunheboto Deputy Commissioner Rahul Bhanudas Mali, IAS-i metetdaksüogo.

Tzünglu kanga aruba ajanga

tesem kar nung anentsüh alua lir. Anungji iba lenmang nung gari tili anir senzürtemi kanga kümdangtsüla aser gari tulutemi tanga tetuyuba ka magütsü tashi VK- Alichen - Akuluto - Zunheboto leni senzütsü metetdaksür, ta Zunheboto DC-isa ashi.

## Manipur MLA 23-i Defence Minister den ajurutepe

**Imphal, June 19, 2023 (Agencies):** Manipur nungi Bharatiya Janata Party (BJP) aser National People's Party (NPP) MLA 23-i Hombarnü Delhi nung Union Defence Minister Rajnath Singh den ajurutepego.

MLA temi Defence Minister Rajnath dang Manipur tensa indang osang lemsatep aser iba ya aziüktsü atema mepishi.

Manipur MLA temisa Centre dang state nung mepetmesü adoka raratepba anendaksütsü aser state litsü kümzüka yimjung

bener arutsü atema takhangba agütsü.

Manipur nung telungpur teloktemi ground rules alema inyakba atema merenshitsu aser SoO meyipa agir telungpurtem pei pei designated camps-i anir arutsü atema MLA temisa takhangba agütsü.

2017 election nung telungpur telok kari BJP yariogo ta shia central BJP leaders kar aitsüba atema Centre-i osang tejangja metetdaksütsüla ta Manipur MLA temisa ashi.

## LLRPO-i sorkar dang Foothills Road yanglutsü rongshir

**Dimapur, June 19, 2023 (TYO):** NFHRCC-i State sorkar dang NEC teyari ajanga Trans Nagaland Highway (Foothills Road) yanglutsü mepishiba nung Lotha Lower Range Public Organisation (LLRPO)-ia pusema nungitba metetdaksüogo.

September 22, 2022 nü NLA Resolution nung aliba ama NEC Funding ajanga Foothills Road

yanglutsüla ta LLRPO-i sangdong ka nung ashi.

Chief Minister Nephui Rio aser pa den külemi inyakterem lenisüba asoshi tenüngsang agütsür aser 2023-24 financial year tsüngda Trans Nagaland Highway(Foothills Road) yanglutsü ayongzüker, ta President T. Amos Kikon aser Secretary A. Yansathung Jami nati sangdong ka nung ashi.

## Nagaland sorkari tanur indang temetentem kümzüka ayur



**Kohima, June 19, 2023 (TYO):** Nagaland sorkari tanur indang temeten balala kümzüka ayur aser iba maparen akangshitsu atema inyaker ta Nagaland State Commission for Protection of Child Rights (NSCPCR) chairman, Alun Hangsing-i ashi.

Hotel 2K Kohima nung Child Rights in Nagaland indang Child Welfare Committees (CWCs) arangshiba sentong nung Alun Hangsing-i iba osang metetdaksü.

Iba sentong ya National Commission for Protection of Child Rights (NCPCR)-i Nagaland State Commission for Protection of Child Rights (NSCPCR) den külemi ayongzüka agir aser Seva Bharti Purbanchal (SBP)-ia yariteper.

Nagaland sorkari tanurtem indang temetentem atema süoki ia bilemer. Iba ya 1992 küm India sorkari yanglua agizük aser 2013 nung Nagaland sorkaria agizükogo, ta Hangsing-i ashi.

Nagaland-i küm9 tejakdang iba

Act agizük aser Chief Minister Nephui Rio lenisüba kübok sorkari iba ya kümzüka ayutsü atema inyaker, ta paisa ashi.

NSCPCR-i iba atema süoki ia bilemer aser sorkaria Nagaland nung tanurtem temeten indang reju akangshinür, ta Hangsing-isa shisem.

"NSCPCR ketdangsurtem aser District CWCs ajanga tanur indang temetentem kümzüka ayutsü atema inyaksüla aser Nagaland nung tanurtem tiptema lidaksütsü merangtsüla. State sorkar indang alizüngji tanurtem asoshi tarutsü tajung ka yanglutsünür aser iba atema tanurtem tiptema aintsüla" ta pai metetdaksü.

Commission-i temetentem kümzüka ayutsü asoshi tongshi pezüji- Right to survival, Right to protection, Right to development aser Right to participation lir. Tanurtem asoshi inyaksüba mapaji CWCs dak keta lir, ta paisa ashi.

Paisa NCPCR dang tanurtem

indang temeten asoshi tebilemstü abenba aser Nagaland nung CWCs arangshitsuaba atema pelaba metetdaksü.

"Nisung ajaki tanur ka kümzüka ayutsü atema tebilemstü abener. Tanur indang temetentem dang masü saka tanur ka renloka aotsü asoshi asenok ajaki bilemstür" ta Social Welfare Department, Nagaland Additional Secretary Yongchingkumla-i o jembidang ashi.

"State sorkari tanurtem kümzüka ayutsü aser anepalutsü atema schema balala inyaker. Ia sentong ajanga tanur temetentem tajungba nung kümzüka ayutsü angazüktsü imlar" ta lai ashi.

Iba sentong nung Child Labour and Children in Distress, NCPCR, Division Head Payal-i Sharma okila jembii aser member SCPCR Nagaland, Akumla Longchari-i tesentepertem pelaa agizük.

Child Welfare Committees (CWCs) arangshiba sentong ya June 25, 2023 nü tembangtsü.

## Manipur CM-i Meitei nung dang mepishir

**Imphal, June 19, 2023 (Agencies):** Manipur Chief Minister N Biren Singh-i prangpong bena aliba Meitei nung dang tangar mamaktsü aser yimjung nung alitsü mepishia metetdaksüogo.

"Prangpong bena aliba Meitei nung dang ni tangar mamaktsü aser Manipur nung tensa süngjemsü atema yimjung nung alitsü ni mepishir" ta Biren Singh-i ashi.

Mizoram Chief Minister Zoramthanga den jembiba indang

olen ka ashidang "pai state nung tensa süngjemba nung akokba tashi yariteptsü aser Mizoram nung aliba Meitei nung ajak yaritsü nangzükogo" ta Biren-i ashi.

June 18 nü Chief Minister Zoramthanga-i Manipur Chief Minister Biren den jembitepba aser ken o angatetteptsü atema tena tebilemba kar lemsatepba osang metetdaksa liasü.

Külen, Mizoram nungi Rajya Sabha MP K Vanlalvena-ibo Manipur nung President's Rule benoktsü takhangba agütsüogo.

Vanlalvena-isa Manipur tensa maziükba atema Centre sorkar aitsü.

"Centre sorkari Manipur nung President's Rule benoka Chief Minister N Biren Singh-i aniba BJP sorkar agientsüla. Yamaji asü nung dang central forces-i parnok kübok Manipur Police yur tensa aziükttetsü" ta Rajya Sabha MP-isa ashi.

Manipur Police-i tejak repranga inyaksangshir anungji parnok President ketdangsuba kübok ayutsüla, ta paisa ashi.

## Brahmaputra nung tzü mesemi ayimer; Red alert sangoktsür

**Guwahati, June 19, 2023 (Agencies):** Assam nung tesüiba anogo ishika tzünglu kanga aruba ajanga Brahmaputra ayong nung tzü mesemi ayimer aser tesem aika nung warning level tongogo.

Tezpur, Dibrugarh aser Majuli district tem nung Brahmaputra ayong nung tzü 'danger mark' adenogo saka tang tashi Guwahati nungbo 'danger mark' kübok lir.

"Tanep 8:00 ako tashi nung Guwahati nung water level 48.45 metres liasü" ta Inland Water Department ketdangsur kati ashi.

"Tayongzükba aika liaka Guwahati nung anügdang dang ferry services melatsü" ta Inland Water Transport executive engineer Jayanta Gogoi-i ashi.

Bhutan nung aliba Kurichhu hydropower plant nungi tzü chiocka ajanga Assam nung tzümetsüng timtem tamajungba akümtsü akok.

Bhutan dam nungi tzü chiocka ajanga Barpeta district nung Pahumara river aser Kaladiya river nung tzü talila ayimer.

Assam tzümetsüng timtem nung district 13 nungi nisung 37, 535 tashi timtemer ta state disaster management authority-ia metetdaksüogo.

Külen, India Meteorological Department (IMD)-i Assam kübok district aika nung June 22 tashi tzünglu kanga arutsü metetdaksüogo.

Taruba anogo ana tsüngda Kokrajhar, Chirang, Baksa,

Barpeta aser Bongaigaon district tem nung tzünglu kanga arutsü. Maneni, Dhubri, Kamrup, Nalbari, Dima Hasao, Cachar, Goalpara aser Karimganj district tem nunga tzünglu arutsü imlar ta IMD-i ashi.

Assam nung tzümetsüng agi kanga mejungi kongshia aliba district ji Lakhimpur lir. Iba district nung nisung 25,275 dak kongshia lir, parnok sülen Dibrugarh (nisung 3857) aser Tinsukia (nisung 2666) dak kongshia lir ta Assam State Disaster Management Authority (ASDMA)-i ashi.

Tang ya Assam nung yimsüng 142 tashi tzü agi mobanga lir aser ali tasazük 1,510.98 hectares nung tsünisenbongtsü raksoago.

### DABA LOKTI LENIRTEM DEN TELONGJEM

DABA Züngsem civil society nung tenzüker Officers & Executive Member, Colony chairman & secretary aser GB den telongjem mapang ka alitsü pelashishia jaoker.

Lokti aser kija dangi osang yoktsü tasak asüba agi Tenla kidang metetdaksüba aser osang kaket nung dang metetdaksür.

Anogo : 24th June 2023.  
Mapang : 9am.  
Tesentepdak : Duncan tenla ki.  
Tsüngrem O : Prof. Imchayanger.

Sd/-  
Rev. I Wati  
Pastor.

## ATI nung sorkar ketdangsür Mid-Career Training tenzükogo



**Dimapur, Aami/June 19 (TYO):** Government of Nagaland nung ketdangsürtem atema pongunü Mid-Career Training sentong Department of P&AR, Govt. of Nagaland ajanga St. Stephen's Centre for Advanced Learning, New Delhi den lungjemer Administrative Training Institute, Kohima nung June 19, 2023 nü tenzük aser June 23, 2023 tashi agütsür.

Iba training nung policy

yangluba aser mapa kuma inyakba indang onüktem awajemtsü.

Iba sentong tenzükba Secretary to the Government of Nagaland, P&AR, Akunu Meyase-i moatsü aser iba training indang teratet aser nükjidong lemsa liasü.

Iba training nung department balala nungi directorates aser district tem nungi ketdangsür 36 adener, kong shisalen sayurtem

Sanjay Sahay, IPS, Founder Director, Tech Con Pro Private Limited; Prof. Prajapati Trivedi, Commonwealth Secretary-General's Special Envoy for SDG Implementation, Commonwealth Secretariat, London, UK, aser Amar Nayak, Associate Professor, Strategic Management at Xavier Institute of Management, Bhubaneswar, India nungertem alitsü.

## NLA indang Committee of Privileges senden mezüngbuba menogo

**Dimapur, Aami/June 19 (TYO):** Nagaland Legislative Assembly indang Committee of Privileges (2023-2024) mezüngbuba senden Assembly Secretariat, Kohima nung aliba Committee Room nung June 5, 2023 nikongdang 2:00 ako nungu tenzük MLA Moatoshi Longkumer lenistüba kübok mena liasü.

2023-2024 atema Committee of Privileges nung Moatoshi Longkumer chairman aser züngsemtem A. Pongshi Phom, Y. Mankhao Konyak, Y. Mhonbemo Humtsoe, T.N.

Mannen, Sethrongkyu aser Benei M. Lamthiu alitsü.

Iba senden nung Committee of Privileges indang Chairman, Moatoshi Longkumer-i züngsemtem den Committee indang tashi aser inyakyim lemsatapa liasü.

House of Legislatures aser iba Committees aser züngsem temeden Constitution of India indang Arrla 194 nung mela aliba indang pai lemsatapa liasü.

Züngsemtem tetsükdaktsü makai maparen inyaktetsü nükjidong nung item privileges ya agüja lir aser züngsem temi itemji

meteta alitsüla, ta Moatoshi Longkumer-i ashi.

House aser züngsemtem tashi temeden wazüka ayutsü asoshi iba Committee ya Legislature tem asoshi kanga tongtipang lir, ta pai rateta ashi.

Pai iba mapang züngsemtem den 'Breach of privilege' aser 'Contempt of House' indang teratet lemsatapa liasü.

Paisa züngsemtem dang Committee nem temolung lema nungloktsüba maparen takok ngua tajungtiba nung inyaktetsü asoshi ajaki amalitep akatsü aser shilem agütsü ayongzükba liasü.

## Contractor Pele Khezhie-i aluyimba dangi meyiptsü ayongzük

**Kohima, Aami/June 19 (TYO):** First Class Contractor süaka tanü Pelesielie Khezhie-i yimchiyimjung aser terenlok atema Naga nunger ali temu dangi meyipa oa alu mapa inyaktetsü ayongzükba liasü.

Pelesielie (Pele) Khezhie ya Nagaland Contractors' & Suppliers Union (NCSU) tir lir aser pai iba o ya Viphoma yimdak par lu nung metsü yokba maparen tenzükdang jembia

liasü.

State nung mapa inyaka alitsü industry tulu mali saka Nagaland ali temu agi sünga lir aser senso ajak alu yimtettsüsa ali lir, anungji aluyimba ajanga rongsenketzüng tashi itdaktsütsü asoshi rangloker inyaktetsüla, ta pai ashi.

Khezhie-i tsük lu ayimba den ano Kohima-Nuiland lenmang nung Dzudza River, Viphoma nung kozü, lemon, litchi aser

naring amala plantation yoka lir, aser pai ashiba agi, Nagaland rongsenketzüng tashi aittsü aluyimba nung keta lir.

Chiyongtsü peria angutsü aser pei poksünga alitsü atema nüburttem ali dangi meyiptsüla, ta pai ashi.

Linük den tokteptsü aser chiyongtsü peria angutsü asoshi Naga nungeri alu ayimtsüla, koba takum alitsü asoshi tajungtiba lenmang lir, ta pai ashi.

## Tanü State Level Apprenticeship Awareness Workshop agütsü

**Dimapur, Aami/June 19 (TYO):** Regional Directorate of Skill Development and Entrepreneurship, Assam, Ministry of Skill Development and Entrepreneurship, Government of India ajanga Department of Employment, Skill Development, and Entrepreneurship, Government of Nagaland teyari nung June 20, 2023 nü Capital Convention Center, Kohima nung State Level Apprenticeship Awareness Workshop ayongzüktsü.

Iba sentong nung tetushi tesemdanger ama Advisor, Labour and Employment, Skill Development and Entrepreneurship, and Excise, Moatoshi Longkumer-i moatsütsü.

Iba workshop nükjidong ya apprenticeship ecosystem nung stakeholders ajungai shilem agiba tajungba kuma renloktsü

aser state nung apprenticeship training temaba jenjangi ajungkettsü lir.

Industry lenirtem, academia, school aser Industrial Training Institutes (ITIs) külemi anidenba ajanga iba workshop nung sensaksem akatsü aser apprenticeship training renlokba nung lungjemtsü.

Iba workshop indang technical session mapang National Apprenticeship Promotion Scheme (NAPS) nung rangloktsü.

Iba sentong nung shilem agirtem scheme nungi teyari aser tayongzükbatem tali tejangjaba nung angatetsü aser takok ngua mapa kuma inyaktetsü asoshi tasa tajung yanglutsü.

Ano online sapang tajungtiba nung amshitsü asoshi teyari agütsütsü asoshi apprenticeship portal walkthrough session alitsü.

## DC Kohima ajanga Letter Mart atema metetdaksür

**Dimapur, Aami/June 19 (TYO):** PRB Act 1867 omdamh Section 8 nung aliba ama Registrar of Newspaper for India (RNI) Regd No. Nageng/2016/69894 nung register süa aliba "Letter Mart" tanü nungi agütsü, ta Deputy Commissioner Kohima, Shanavas C IAS ajanga June 15, 2023 nü sangdong ka nung ashi.

PRB Act 1867 indang Section 19D nung shia aliba ama Ministry of Information and Broadcasting, Government

of India, Office of Registrar of Newspapers of India, New Delhi nem Claims and Objections report magütsütetba aser tesüiba küm asem atonga Annual Statement magütsüba ajanga iba 'Notice of Cancellation' ya agütsür, ta sangdong ajanga ashi.

Kohima district kübok RNI nung register süa aliba 'non-existent publication' agütsüba atema "Claims and Objections" kar danga lira tezüluba nung it aka tsüngta agütsütsü 1/10/2018 nung sangdonga liasü.

## Mokokchung district nung IDCF mapa inyak



**Dimapur, Aami/June 19 (TYO):** Ministry of Health & Family Welfare nungi totuyuba agütsüba ama Mokokchung district kübok tesem balala nung June 5-17, 2023 anogotem IDCF (Intensified Diarrhoea Control Fortnight) maparen inyaka liasü.

India nung aliba states aser UTs ajak nung Diarrhoea ajanga tanur asüba anendaktsütsü linük nükjidong aliba nung shilem ka ama iba maparen ya inyaka liasü.

Ministry ajanga 'targeted population' shilem 90 nem 2025 tashinung ORS aser Zinc agütsütsü India Action Plan for

Pneumonia and Diarrhoea (IAPPD) nung lir.

Saktsü-pokshi agi asüba ketdangsütsü aser azüoktsü atema Department of Health & Family Welfare Mokokchung ajanga district nung aliba health units aser yimtsüngtem nung IDCF maparen inyaka liasü aser iba mapang saktsü-pokshi ketdangsüba aser mürekmejuba atema awareness agüja liasü.

Maneni iba mapang diarrhoea case management atema service agütsüba tashi itshidaktsü, ASHAs temi tanur arishi küm pongu tekübok alirtem nem ORS-Zinc lema agüja liasü.



**GOVERNMENT OF NAGALAND**  
**DIRECTORATE OF INDUSTRIES & COMMERCE**  
NAGALAND : KOHIMA

**PRE-JOB PLACEMENT CUM ENTREPRENEURSHIP SKILL TRAINING**  
(At Nagaland Tool Room & Training Centre)

SN	Job Roles/Course Name	Age	Course Duration	Eligibility	Tentative Start Date
1	Assistant Welder (Electric)	Between 18 to 45 Years	2 months	8 <sup>th</sup> Pass	28 <sup>th</sup> June 2023
2	Welder Electric or Gas/MIG		3 months	10 <sup>th</sup> Pass	20 <sup>th</sup> June 2023
4	Automobile Body Mechanic		2 months	10 <sup>th</sup> Pass	2023

**Features:**

- Free of cost Training course, Fooding & Lodging.
- Assistance and guidance for setting up of new enterprise.
- Job Placement Assistance after completion of training.
- Admission on first come first basis

**Documents Required:**

- Aadhaar with phone linked.
- Educational qualification certificate.
- Birth certificate.
- SC/ST certificate.
- Recent Passport Photo (3 copies)

**For Further Assistance, Contact: 7005227477/ 8837426161 (M)**

**Sd/- Shri. A. Temjen Jamir**  
Director & CEO, NTTC

• Website: www.nttcdimapur.org.in • Email-ID nttcdimapur@gmail.com  
New Industrial Estate, Sub-Jail Junction (Tinali), NH-36 Diphu Road, Dimapur: Nagaland

**GOVERNMENT OF NAGALAND  
DIRECTORATE OF TECHNICAL EDUCATION  
NAGALAND: KOHIMA**

*Dated, Kohima, the 16th of June 2023.*

**NOTIFICATION**

NO.DTE/ESTT-2/3/2016-17: In pursuance to this office Notification of even number dated 2nd June, 2023, the following candidates are hereby selected for undergoing Diploma courses outside the State during 2023-2024 sessions as given below.

**Selected List of Diploma Outside the State during 2023-2024.**

Sl. No	Name of Candidate	Name of Course	Name of Institute
1	Ms. MünüliRinga	Computer Sc. & Engineering	Rajiv Gandhi Govt. Polytechnic College, Itanagar, Papum Pare District
2.	Mr. KelengolPucho	Film & Video Editing	Dr. Bhupen Hazarika Regional Government Film & Television Institute
3.	Ms. Manthang A Konyak	Mechanical Engineering	C.P. Namchoom Govt. Polytechnic College, Namsai
4.	Mr. Chunben Patton	Printing Technology	Regional Institute of Printing Technology, Kolkata
5.	Ms. L. LilienPhom	Photography	Regional Institute of Printing Technology, Kolkata
6.	Mr. KekhrishuKhuromo	Electrical Engineering	Govt. Polytechnic College, Pasighat
7	Mr. RokozelVitsu	Electrical Engineering	C.P. Namchoom Govt. Polytechnic College, Namsai
8	Ms. SanenjilaLongchar	Travel & Trousism Management	Rajiv Gandhi Govt. Polytechnic College, Itanagar, Papum Pare District
9	Mr. N EngkangKonyak	Civil Engineering	Govt. Polytechnic College, Dirang, West Kameng

The selected candidates are directed to submit their acceptance letter to the undersigned on or before the 21st of June 2023.

**(ER.VIPULHOULHONGU)**  
Director

**Rajnath Singh aser Vietnam Defence Minister na sensak asem**



**New Delhi, Aami/June 19 (Agencies):** Defence Minister Rajnath Singh aser Vietnam Defence Minister General Phan Van Giang na Hombarnü sensaksemogo. General Phan Van Giang tang anogo ana atema India semdangba mapang lir.

Iba senden nung Chief of Defence Staff General Anil Chauhan aser ministry nungi tanga ketdangsurtemi shilem agia liasü. Linük ana ya bilateral defence tesendaktep akangshitsü aser South China Sea nung tang tensa mejungi

aliba lepa reprangshitsü asoshi rangloker lir. Senden nung telok anapronglai arok tejangraba dak sendakba nung regional aser global ken o tem lemsatepa liasü.

2007 küm July ita Vietnam indang taoba Ato Kilonser Nguyen Tan Dung-i India semdangba mapang linük ana tesendaktep ya 'strategic partnership' jenjangi ajugketa liasü.

2016 küm Ato kilonser Narendra Modi-i Vietnam semdangba mapang bilateral

tesendaktep ya maneni "comprehensive strategic partnership" jenjangi ajugket aser India-i Act East policy dak rangloker inyaksangshiba mapang Vietnam ya tongtibang partner ka kümogo aser linük ana tsüngda defence dak sendakba nung services, military-to-military exchanges, capacity building, aser training sentongtem atema tenangzüktepa aika yangluogo.

Rajnath Singh-i 2022 küm June ita Vietnam semdangba mapang India-Vietnam defence partnership aser mutual logistics support dak sendakba nung tenangzüktepa yanglua liasü.

Hombarnü General Giang-i Tri-Service Guard of Honour asadang aser National War Memorial nung naro tokja sepaitem nem aküm tetushi agüja liasü.

General Giang-i Uttar Pradesh nung Agra semdangtsü sentong yanglur lir.

**PM Modi-i Egypt nung Al-Hakim mosque semdangtsü**

**New Delhi, Aami/June 19 (Agencies):** Ato Kilonser Narendra Modi-i tang mezüngbuba Egypt semdangba mapang aso 11buba nung yangluba Al-Hakim mosque semdangtsü aser First World War nung asüba India nunger sepaitem nem aküm tetushi agütsütsü, ta foreign secretary Vinay Mohan Kwatra-i Hombarnü metetdaksü.

Ato Kilonser-i US aser Egypt semdangtsü aliba dak sendakba nung osangbenertem den sensaksemba mapang pai iba osang metetdakja liasü.

Kwatra-i, "Ato kilonser-i tang mezüngbuba Egypt semdangtsü aser 1997 küm sülen tang mezüngbuba India Ato Kilonser kati officially Egypt semdangtsü," ta ashi.

Paisa, iba tsüngda nung PM temi Egypt semdangoggo, ajisüaka PM temi multilateral mesüra plurilateral sentongtem atema semdangba dang liasü.

Modi Junr 24 nü Cairo atongba sülen mezüngbuba India unit den ajuruteptsü, koba Egypt tir-i India semdangba sülen tentetsüba high-level minister tem unit ka lir.

"Tawa Egypt tir-i India semdanga Republic Day nung tongti tesemdanger shilem agiogo. Ato Kilonser June 24 nü Cairo tonga aotsü imlar aser pai mezüngbuba India unit den sensak asemtsü," ta Foreign Secretary-i ashi.

Paisa, Egypt tir-i India semdangba sülen taoba ita ishika tsüngda nung Egypt den minister tem jenjang nung shisatsü lemsatepba India-i ajangshio, ta ashi.

"External affairs minister, defence minister aser minister of environment Egypt-i ogo. Kasaji Egypt nungi minister asem pezü kati India semdangoggo," ta pai ashi.

Maneni PM-i Egypt semdangtsü aliba indang jembiba mapang Kwatra-i,

India unit den sensak asema sülen PM-i Egypt nung India nungertem den sensak asemtsü aser Egypt nung tongtibang nisung kar den ajuruteptsü imlar, ta ashi.

"Cario tonger tasüngnü pai Al-Hakim mosque semdangtsü. Iba mosque ya aso 11buba nung yangluba lir, koba Bohra community-i yanglushiogo. Al-Hakim semdangba sülen pai Heliopolis War Grave cemetery semdanga 1st World War nung Egypt atema taküm bendanga agüja raraba India nunger seaitem nem aküm tetushi agütsütsü," ta pai shisem.

Iba sülen PM-i Egypt tir den ajurutepa bilateral sensaksem akatsü aser MoU balala nung sign asütsü, ta Kwatra-i ashi.

Paisa, India-i G20 tir mapa bener aliba mapang Egypt-a alakteta jaoker ama jaokogo, ta ashi. Egypt mesemdang tsüngda PM Modi-i United States semdangtsü. Tir Joe Biden-i pa jaokba sülen PM-i US semdangtsü.

**J&K BJP aser tanga party temi election agitsü ayongzük**

**New Delhi, Aami/June 19 (Agencies):** Political party balala nungi lenirtemi Election Commission (EC) dang Jammu and Kashmir nung Assembly elections takaratiba nung ayongzüka agitsü atema mepeshia metetdaksüogo.

J&K nung 2018 küm June 20 nü President's rule benoka liasü.

Deobarnü J&K BJP tekolakba Ravinder Raina-i, EC dang Union Territory nung Assembly takaratiba nung ayongzüka agitsü mepeshia liasü.

"Anogo ishika tejakdang taoba chief minister Omar Abdullah-i, BJP pur election nungi jena aor ta shi onok aitsüogo. Assembly election agitsü atema BJP renema lir. Ni EC dang takaratiba nung election agitsüba anogo sangdongtsü mepeshir," ta Raina Srinagar nung lokti senden ka nung jembiba mapang ashi.

Political party balala nungi lenirtemi Delhi nung J&K nungi Article 370 aginba aser President's rule benoker küm pongu inyaksangshia aruba mapang tatalokbatem indang sensaksemtsü asoshi seminar ka agiba mapang election takaratiba nung agitsü atema mepeshia liasü.

"Article 370 aginba sülen Kashmir nung yimjung adoktsü, senotsü teyari angutsü aser mapa aika angutsü ta bilema liasü saka kecha matalok," ta National Conference lenir Tanvir Sadiq-i Delhi nung seminar agiba

mapang ashi. "Tebilemdangba balaka aliba ya anti-national ama agizükba mapang ka nung onok alir. Ajisüaka Kashmir nung democracy atema onoki jembitsüla," ta Sadiq-i ashi.

Tawa Democratic Progressive Azad Party tekolakba Ghulam Nabi Azad-ia J&K nung election ayongzüka agitsü atema ayongzükoggo.

Jammu and Kashmir National Panthers Party nungi taoba J&K education minister Harsh Dev Singh-i ashiba agi, parnok indang election manifesto nung BJP-i sorkar küm tetra Article 370 dak sendakba nung sensaksem akatsü ta tenangzükba agütsüogo.

Ajisüaka Centre-i August 5, 2019 nü Articles 370 aser 35A agin aser state ya UT ana (UTs-J&K aser Ladakh) kuma lemsatsü.

"Ni state ka UT jenjangi ludaktsüba kodanga mongudang," ta Singh-i ashi. "Sorkari G20 summit ayongzüka J&K nung tensa kanga junga lir ta shitetra kechiba assembly elections ayongzüka magir?" ta pai ashi.

Gopi Kishen Mujoo, shiba 1996 Assembly election nung BJP ticket nungi toktepa liasü pai Centre dang election magi tsüngda J&K nem state jenjang tanaben agütsütsü takhangba agütsüogo. "Kashmir nung BJP pur jenjang koma asütsü aji mejangjaba agi parnoki election maginer asütsü akok," ta pai ashi.

**US Embassy-i student visa atema interview agitsüba anogo lapoktsüogo**

**New Delhi, Aami/June 19 (Agencies):** 2023 küm US nung oa university balala nung azüngtsü asoshi sentong aliba India nunger kaketshirtem anisüngzükdakja visas atema interview agitsü asoshi anogo lapoktsüogo.

Deobar nikonsgtsütsü social media ajanga US Embassy-i, student visa interviews appointment tem India ajunga nung July tom nungi August tom tashi agitsü lapoktsüogo, ta metetdaksü. Kaketshirtem dang appointment mekazüka ayutsü atema Ustraveldocs.com semdangtsü asoshi metetdaksüogo.

Taoba hopta Times of India den sensaksemba mapang US Embassy ketdangsur kati ashiba agi, "onoki appointments meyrejang aika agütsüogo aser July aser August ita appointments meyrejang aika agütsütsü. Applicant temi taruba appointment atema onok indang website anogo nung khen mesüra anabenbosa semdanga

alitsü nüngdaker." Tanga mapang dang nungi kaketshirtem taküm timba interview agitsü India nung US diplomatic mission timla aliba parnoki sangdong ka ajanga metetdaksüogo.

Education consultancy Collegify, co-founder aser director Adarsh Khandelwal-i ashiba agi, July aser August ita student visa atema interview agitsü asoshi maongka agütsür asünung India nunger kaketshirtem shirnok F-1 visa atatepdar parnoki agents mesüra touts tem teyari agitsü melena pei azünga aliba anogo ka mekazütsüla.

"Tang mezüngbuba interview nung shilem agitsü alirtem atema July aser August ita anogo atakzüktsüogo. Kaketshirtem shirnoki mapang matakzüktsüba ajanga anogo menor mekazüka lir parnoki parnok indang university admission shiti dak ajemdaker interview atema anogo melenshitetsü," ta pai ashi.



## TIR YIMYIM YIMOBILEM (EDITORIAL)

DIMAPUR SANGTENNÜ, AAMI (JUNE) 20, 2023

### Tezü dak matangba PM

**M**anipur lenden nung government-a mali ama Union minister meyong ki tashi rongdokja kin o kin na azü tokshia anogo shia rarateper saka election mapang amato masü, India ato kilonser (prime minister)-ibo tang tashi pa bang nungi tejashi, tesasaba, temeim aser temepishiba ojang kata madoker. Ibaji tesüngmangtsüka lir. Manipur nung lendong ataloker anogo 45 tsüngda nisung noklang aika süogo saka shingaia tejangja meshitetter, kechiyong pei kinunger adianu tasü mang dena bushia moutetter. Aji oda, nisung telidak kibo taronga aika rongtsüogo aser ki meyirijang aika raksatsüogo aser yim karbo tetsübu agi tali majung azüngtettsüogo. Iba ama tensa tia ka nung, pei akaba ajak samar talidak ki maka tesem balala nung relief camps aser tangar kidang jenoka lir. Itemji talidaka maka aser taodaka maka ta temeimsü tensa tia nung shisaboluseta lir. Iba ama mapang nung teyari dang masü saka mulung anisüngzük aser teimla o kanga nungdaker. Item o ji lenir aser yimsüsürtem nungi arutsüla. Ajisüaka, center government nungi kilo kilonser Amit Shah khen Imphal tashi orr Manipur angh aser chief minister nati anir Yimjung bushiba luden ka shimba ajanga tensa-ang tamajungba akümba nguogo. Iba tashi nunga Narendra Modi-ibo tesasaba olen ka ashiba mangashir. Iba amai pei nübortem mangyim jashi aser takoxa lendong tulu ajurur aliba tensa tia ya mangu aser memetet ama ola kata madok yutsüba shisatsü yabo tajung masü. Linük nung Dr. Manmohan Singh-i aniba Congress government alidangbo, BJP lenir Narendra Modi-i Manmohan Singh dang ola madoksang ato kilonser ta aitsüpet aija jembiba bilemtetter. Ajisüaka, tangbo Manmohan Singh amenba kasa menden nung mener Narendra Modi-ang ola makaba kümogo. Iba jagi tejashi marem yakanü Imphal nungbo ato kilonser Narendra Modii ita shia radio nung nübortem den jembiba onük manganü pa dang tejashi tulu sayua nübortemi pei radio rongdokba asenoki nguogo. Atangji, anogo 40 dak tali Imphal yimti nung tangar kitem dang masü saka yimsüsür minister aser MLA ki tashi rongdokja nübortemi amakba aser Manipur nung government office aser kaketreju kata lapoka mapa meinyaktetsüsa anogo shia kari kar yim amaker aser kari kar tepseter ta azü tokshiba lima ka kümaka, linük nung ato kilonseri Manipur tensa tia indang yimjak nung ojang kata memetetdaksübaji Manipur nung asoshi dang masü saka linük nung India sensosangertem ajak mezüngmeshiba mapa ka asütsü. Ibaji sensosangertem ajak asoshi shisabolutsüka lir. Aji oda, taoba anogo 40 tashi Manipur agi tongpang raradak tesem kümer nisungtem mangyim jashi tia nung alidang ola madokaka, yakanü ato kilonseri nübortem den ita shia jembiba radio sentong nungbo Manipur tensa asoshi aria bilema jembitsü ajaki bilema liasü. Ajisüaka, Manipur nung nübortem tali majung timtemba indang ariabilem o den teimla kabo agüja jembitsü melen, akhidang Indira Gandhi ato kilonser mapang linük nung Emergency mapang agütsüba indang aija jembibaji tsüraburi pei tanur ajep mangashii tangar kisung aija jembia among amai lir. Iba shisatsü jagibo Manipur nung ajak remoka asüyonga ola madok yutsür akiyaa aotsü. Ylmten yimsüsürtem ya nübortem asoshi mapang tajung nung dang masü saka mapang tamajung nungsa tenüngdakba. Aji oda, election mapang nungang aser benjong nung dang nübortem den longsutepa monger lendong anogo nungbo mali amato kümra, iba linük nungjibo nübotsüka government maliang tajungba. Akhi mapangbo Manipur lima nung anogo shia mokdang agi sünger nisungtem pei mapa dena meiyaktet akoxa, saka BJP teloki aniba government arurbo item tesemtem nung mokdangba osang tangashia mangashir ta yimjung bener aruba osang yimjak nung ayimtenba kasa ola tajung to agi, ano Manipur nung aliba nübortem sünepja ato kilonser Narendra Modii metetdaksütsü imlar. Iba amaji ka matalokra, talisa Manipur nung BJP lenirtem asoshi shisabolutsüka asütsü.

## OLEMSABANG

### OBA! YA NI ANGATET ASÜBO

~ Lanu Atsongchanger, 2023

Iba lima asenok teti alitsü aru masü  
Ya adangji meimchir ajaki metetba  
Akumli lima alidang koma ali,  
Iba tsüngnepji dang agitsü.  
Oba! na akumli ali dang na nungi aika angazükogo  
Ashila na akumli dang ni ya angatet asübo,  
Takum nung mesasasai lila ta,  
Tanü temulung ayangseta mokorai nüktzü aneter.  
Adianutem aser tangari ne dang mezüngmeshi O ashidang,  
Na jashitsüsa jakdaka na anema inyakdang,  
Mokorai Oba, nai "kecha masür" ta aremzük.  
Na mulung yirutsüsa O ashidang,  
Ne kumli talang agi ola madok tensa süngjemdaksü.  
Na akumli ali dang ya ni angatet asübo  
Aya Oba, "na taremzük tebu ka" ta shila.  
Na akumli ali dang ya ni angatet asübo,  
"Na kumli tajung tebu ka" ta shilasüng.  
Item anogotem süitemadoker, tanü sasasete longrar.  
Na akumli ali dang ni ne nem shisa magütsütet,  
Na akumli ali dang ni ne O süoki yei maki,  
Na akumli ali dang ni na teka mapa nung meyaritet.  
Na akumli ali dang ni ne nem mapang magütsütet.  
Item anogotem to khen dang meyipa arulasang koda jungla.  
Aya, Oba! ne takum otsü ni zulomadima?  
Ne takum otsüji ne akumli dang shimadima?  
Ne tatishitsü tajung iba lima ni angazükmadima?  
Na akumli alidang item ya ni angatet asübo,  
Aya, Oba! ni ne dang sentsüh melilasüng.  
Akumliri tasür den jembia nung pari asen dang langzüdi ma?  
Akumli atema iba ya tamakoksü kumadokogo.  
Kü mulung molu tzüym telung nung ali ama,  
Aka soaka lepa marutetba tesasatsü agi neneta lir.  
Oh! saka Oba, nai kotaker den repsema kü dang tai tokangma.

Amen

### SENTILUNG NGUTETBA OBALA

~ S. Aosüngküm Ozüküm

Tsüngrem tereprangtsü kürak yanglusang Obala.  
Tsüngrembo ajak tsütsü onsara tabensa asünung.  
Na ajak nuk ranglokdak tebuti kümdaksü masa no,  
Nasa kibong rangpen jenokdak akhümdong lir.  
Oba ne tenüng tamaren ya, Tsüngrem naroküm.  
Yongji, na hon taribi aser sentiberem danga taoba.  
Temeim oba nai ali ki tobur onsara junga yangluogo,  
Ojalai anir ner jalajabasotem yangji ayip janga mejanger,  
Saka iba dang taoba tanela anisüngzükdak ki ka aginer,  
Oba na shisa taka aser tasü tait ta onoki metetjema lir,  
Kechiaser na sentilung ngutetba tamaren tebuti ka,  
Oba ne dak tangatetba shisatsü mulamushia arener.  
Moatsüogoni, ner anogo mapangtem sütepa,  
Iba anogo kodang adongtsü ta, yongyasete ata,  
Lela süteptang ta onoki mokremer, sarasader,  
Ya kü temeim obalatem arishi süklokba anogo,  
Saka ner medemerbo tasen lumong memedem,  
Nongnangseta, tipu limai arasanga tasenogoni.  
Oba, na kibong ajunga asoshi pokyimsang,  
Tamamangtsü yipu mopong nü kolak nung arem,  
Tsüngyi tsüngpret tashi ajunga titetsang oba,  
Ni tajung kümdaksünü dang na ajak lar aküm.  
Ni aibelendang menürema taitok agütsüsang na.  
Ne taremsük shisatsü ya kong nungi aka? Oba.  
Oba, na kibong rangben lennisüba ajok amsang,  
Kü tarutsü lenmangtem, mejimetsüsa renemjangni,  
Tanela nung ochi aser tasütait nokenketer ka süang.  
Jalajabasotemji Tsüngrem nungi anguba senmang,  
Kata mesamadaksüi ochi lenmang nung aniangma,  
Temeim Oba, nai Tsüngrem dak azüitba tetoktsüma.  
(Tsüngremi Obalatem Ajak moajangma) AMEN.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Uganda nung Islamist temi amakdang kaketshirtem tenüngsang ken tena liasü



Hurubana Kimadi Onesmus-i ashiba agi, par jabaso security guard inyakba aser par semchirtem azüngba school telungi lendong agütsürtem komasür aitar mangateter.

### Mpondwe, Aami/June 19 (Agencies):

Hokulbarnü Uganda nung Islamist telungpur temi school ka amaktsü lia kaketshirtem tenüngsang ken tena liasü, ta school anasa alir tetsür kati ashi.

"Iba sülen ola atoka asatepba ni angashi," ta Mary Masika-i osangbener dang ashi. Mpondwe nung iba lendong nung nisung 40 shi asü.

Iba lendong asoshi Islamic State den sendaktepa aliba telungpur tenüng asener.

Allied Democratic Forces (ADF) ya 1990s nung tentet aser Tir Yoweri Museveni anema nokdaka pai Muslim nung reshikangshia amshir ta tai tongloksü. Tangbo parnok ya timba Democratic Republic of Congo nung alir.

Hokulbarnü amakba Mpondwe Lhubiriha Secondary School ya arütsü anasa lir.

Masika-i ashiba agi, school amakba ya minute 90 shi liasü aser la den anasa alirtem kanga aoksa.

"Iba sülen nung achi-ajem mesüteter aser memejangteter," ta lai ashi.

Kaketshirtem ya mejangtsü anasa ken atener aser aonung 10:00 ako meta ken atenba anena ola adokba ya parnok asayateper ama la aser lar jalai bilema liasü.

Saka kobi melie school nung lendong tesashi kar ataloker ta jangjatet, kong kaketshir 60 shi alir. ADF telungpur tem dormitories telungi ai aser yangji mi senloktsü aser nok amshia

kaketshirtem tepset aser yirutsü.

Mpondwe nung kibong kati tebu aser jabaso asoshi asüpila sentong Deobarnü agia liasü. Tebu ya arishi küm 47 tain security guard Elphanas Mbusa aser par jabaso ya arishi küm 17 tain Masereka Elton liasü.

Par jabaso arishi küm 15 tain Brian Muhindo ya iba school nung zünga liasü aser samar bushir. Tebur trok pua bener aortem rongnung pa dena ali asü mesüra nisung temang ka kanga mejungi rongsar mejangjateti aliba ya ar parnok i memetet.

Hurubana Kimadi Onesmus-i ashiba agi, par jabaso security guard inyakba aser par semchirtem azüngba school telungi lendong agütsürtem komasür aitar mangateter.

"Iba tesem nung mitkartem kanga sashia lir," ta arishi küm 69 tain Onesmus-i ashi.

Tetsürtem mejangba dormitory kima ali nung azü takong aika lir - parnok dak nok agi alep aser jena aor dak prangbong agi akha.

Teburtem mejangba dormitory shibanger liasü - koba telungpur asoshi lapoktsütsü memolung mesüra telungpur temi telung nungi shibanga yutsü alitsü. Telungpur temi iba school nung totzü ain aser mi senloktsü.

Masika-i ashiba agi, aonung 11:30 ako meta iba lendong agütsüba tatemi lar ki anasa lendong agütsürtemi külem züngsem ka dang mapa atem-matem ta asüngdanga liasü.

Parnok Swahili oshi nung jembia liasü aser

iba sülen "Allahu Akbar" (Tsüngremji tulutiba) ta ayimten tenzük.

Item yimyim ayimba sülen parnok rongnung kati "Asenoki takok ngua Museveni linük raksatsüogo," ta shia liasü, ta lai ashi.

Iba azüdokshi atema telangzüba agüja Tir Museveni-i Rwenzori Mountains leni sepai tali yoktsü nangzük, koba Uganda aser DR Congo arütsü nung lir aser "Parnok mapa... tasümaait, kiralongra mapa agi parnok mekumzüktsü," ta ashi.

Mpondwe temeket nungya Khristanpur aser Muslim nungertem meyoktepa alir. Deobarnü asüpila sentong nung adener karbo Muslim nung sübosomelemtü agir arua liasü.

## Tabernacle Church Management Software tasen yanglua lir

### Dimapur, Aami/June 19 (TYO):

Tabernacle Technologies Pvt Ltd ajanga Tabernacle Church Management Software tajungba ka sayaogo.

Iba version tasenba nung arogo temi nüngdakba peritsüsa 'user interface' tajungba, streamlined workflows aser advanced features keta lir.

Tabernacle Church Management Software nung ano tongtipang ka bendenlokbaji Church Accounting functionality ya lir. Iba 'tool' yagi arogo nung accountant temi arogo budget, senotsü indokba record tem ayong-ayonga sayuteter aser 'comprehensive audit reports incorporating cash analysis' sayuteter.

Ajidang masü angatetsü aser amshitsü temela accounting dashboard nungya

## ANOGO ABEN TSÜNGREM DEN

### Tepela nung ruang

T. ken 126:1-6.

Asenok ajak metsü proker ka ka lir ta metetang. Tanü asen ajaki metsü proker aser aji arutsü. Kari shi nung proker. Pauli Galatia 6:8 nung kari shi nung proker aser ibaji teraksa arutsü. Kari adianu rongnung telemsa proker. Kari tiyazü proker. T.Ken 126 nung kechi proker kümdanga proktsü indang ashir, kechiaser asenoki prokba asenoki arutsü.

Ken züluri ashibaji raprangang: "Shirnoki nüktzü yima proker, tepela nung arutsü. Shirnoki teproksü metsü bener jeba aor; pa tanaben tepela agi, pa den tsükpung bener arutsü" (t.5,6). Tsüngremer nübun metsü prokdang jeba proker, saka parnoki tepela nung arutsü. Khristan ka ama nai mapa tajung ajanga, ochi aser temeim ajanga Tsüngrem oji proker. Nai metsüji aremer aser Tanela süngjang temeim, tepela, yimjung, tesünep, taremsük, tamang katetba, pei sasa azüokba adokdaksür.

Takümüji aiben timtema alir, iba jagi asenok nüktzü yimdaksütsü akok, saka tepela nung arutsü. Mamangertem yamaji masü. Tamajung telok aor aser pelatepa proker. Parnoki mapang tajung agir. Saka kodang aluruba arur, parnoki tejashi arutsü.

Asen ajaki telemtetba ka agitsüla: Nai tang jangratemji aginer asü mesüra Tanela Temeshi aluruba ataa alir? "Tekülakokdaksü; Tsüngrem mezüngmeshi masür. Kechiyong kechisa nisungi prokdir ajisa pai arutsü" (Gal. 6:7). Asen mapa nungi adokba asenoki agitsübaji Tsüngremi mulungba lir. Aseni prokba nung tetemlok asenoki arutsü, kechiaser metsüjang kija masür; renloker.

Na tanü temenen tepela asoshi lira, aluruba jagi tajepba bener arutsü. Saka na tanü Tsüngremi mulungba nung lira, alurubaji tepela nung alitsü. Na aser tangar asoshi Tsüngrem metsü; tepela metsü aremtsü Tsüngrem teyari asüngdangang.

sen indokba aser sen anünga "Arogoi nüngdakba ajak aliba sayur, aser arogo tulu-tila keta aliba software tetangshi ajak atema senotsü tajungtiba alitsü kanga tongtipang. nung amshiteter. Generic business software

Iba software nungya timba nung item nüngdakba baptiba, kiyimba aser arogo peria mali. Onok indang Church Management Software züngsem transfer aoba record yangluba mapang arogo tem mela-mela reprangteter, nüngdakba peritsütsü meranga arogo ketdangsür temi yanglua liasü. Iba software yagi arogo indang mapang züngsemtem indang data kumzüktsüba kisüng masü saka tetsükdak makai amshiteter.

Iba software nung 'filtering capabilities' aliba ajanga digital putu nung technology ketdangsür temi arishi küm, tejakleni aoba angazüka yimtsüng, colony amala nung amshitetsü," ta pai ashi.

Iba Tabernacle Church Management Software benteter.

"Arogo ka nung tanüla anidenba kisüng masü saka temi Tabernacle Technologies nübuntem indang osang tejangja Pvt Ltd den 9402679388 ketdangsüba nungi tenzuka mesüra 7005426278 ajanga senotsü aser accounting tongteprateptsü akok.

Inyakyim junga ketdang asütsü Tabernacle Technologies nüngdaker, ta Atoba Pvt ya software yangluba Longkumer, Founder & company ka lir, koba ajanga Director of Tabernacle arogoi nüngdakba software peritsür. Technologies Pvt ajanga ashi.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Rasa**

(v) jashia ain adok (get angry)

\* Ni tashi mangaba agi kübui kü dang kanga *rasa*.

**Rasa**

(v) angateta ashi (explain)

\* Tesayuri onok dang lesson kanga junga *rasaa* ashi.

**OLONG PAITEP # 6550**

	1	2		3	4	5
6					7	
				8	9	
		10				
11						
			12			
13	14	15				16
17					18	

**TIPIEN**

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Repranzük - (4)
- 10. Tasola - (5)
- 11. S \_\_\_\_ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

**LANGTSÜNGLEN**

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. \_\_\_\_ hi - (3)
- 16. Akümüli nungi pilar - (3)

**OLONG PAITEP # 6550 TELANGZÜBA**

**TIPIEN :**

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

**LANGTSÜNGLEN :**

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

**Agüja aliba noksa nung meputepi  
aliba 6 bushiang**



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

**Tepela  
Tasoba Anogo**



- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Majuli-i nisung 134 mener aoba rong ka samaba angu**



**Guwahati, June 19, 2023 (Agencies):**

Assam nung tzü-metsüng timtem tuluba akümba mapang ka nung tanü Jorhat nungi Majuli-i aoba rong ka samar bushitepba nguogo.

MV Lohit rong ya Nimati Ghat, Jorhat nungi Kamalabari, Majuli-i aodang sama.

Tanü nikongdang 1:30 ako nungi Nimati Ghat nungi rong nung nisung 134 mener apuso. Iba rong nungsa motorcycles 32

bena liasü. Tzüsü temelem aser tzü tashi ulura asüba agi rongji sama.

"Tzünglu kanga aruba den tzüsü kanga melema alaba ajanga rongji tzü ajema aliba tesem ka nung anena ata" ta Majuli SP Bibekananda Das-i ashi.

Iba sülen rongji apuso saka tzüsü jagi len samar Kamalabari Ghat masü saka tangaleni ang ao, ta pai ashi.

Iba rong nung GPS system

maliasü aser iba jagi search operation menua inyak, ta SP Das-isa ashi.

Ajisüaka, State Disaster Response Force (SDRF) personnel-i kanga dang mapa tajung inyakba ajanga parnoki rongji ngutet aser passengers ajak anir arutet, ta paisa metetdaksü.

SDRF personnel teyari ajanga speed boat kati rongji anir arua tanü 4:20 ako meta ghat atong.

**Imphal West nung khatepdang Army ka yiru**

**Imphal, June 19, 2023 (Agencies):**

Hombarnü Imphal West district nung nisung kari injang khaloktsüdang Indian Army sepai ka yiru.

Hombarnep züngia Imphal West district kübok Chingmang yimtsüng anasa iba lendong ataloka liasü.

"Prangpong amertemi Kanto Sabal nungi Chingmang yimtsüng tsütsü injang khaloktsü" ta Indian Army indang Spear Corps ajanga ashi.

Iba tesem nung Indian Army-i patrolling süa liasü

asere parnokkia meyipa injang khaloktsü.

"Yimdaklirtem aliba agi Army Columns-i kanga dang kümdanga injang khatok" ta Spear Corps-isa metetdaksü.

Iba lendong nung yiruba Army ji Military Hospital Leimakhong-i anir ao.

Iba tesem nung sepai talila mapa lezmüksüogo aser police den külemi maparen inyakdar, ta Army-isa ashi.

Külen, June 12 aonung 6:30 ako meta Kangpokpi district kübok Khamenlok yimtsüng

nunga mejangjatetba nisung kari injang khaloktsüdang nisung 9 khaset aser aika yirutsü.

Iba tatalokba atema Second-In-Command, Camp Comdt. HQ IGAR (S) VP Srivastav-i FIR benokba nung Indigenous People's Front, Manipur Advisor Jagat Thoundam dak tai tonglokja lir.

Ano, mejangjatetba nisung kari Khamenlok yimtsüng nung ki aika rongdoktsü aser Gobajang, Tamenglong district nunga nisung aika yirutsü.

**CBI-i SI Junmoni Rabha indang electronic devices reprangdangtsü**

**Guwahati, June 19, 2023 (Agencies):**

Assam Police SI Junmoni Rabha asüba atema Central Bureau of Investigation (CBI)-i bushisüngdang aser parnoki la indang electronic equipment meshiogo.

CBI-i Morikolong Police Outpost in-charge Manoj Baruah dang Junmoni-i amshiba electronic equipment ajak bener arutsü jaokogo.

CBI-i IC Manoj Baruah dang

masü saka Nagaon SP Leena Doley dang asüngdangya asütsü imlar kechiyong Junmoni tetsü-i Leena Doley dak-a tai tonglokja lir.

CBI telok nung IT ketdangsur 6 dena lir aser parnoki electronic devices bushisüngdangtsü.

IT telok ket nung storage devices nungi delete asüba data angutsü indang software balaka lir ta osang angazüker.

Junmoni indang phone nungi data agienogo anungji tekaratiba nung phone reprangtsüla ta Junmoni tetsüi taoba mapang ashi.

Junmoni Rabha-i Nagaon nung inyakba mapang amshiba electronic devices ajak IT teloki reprangdangtsü.

CBI-isa SI Abhajyoti Rabha dena police ketdangsur pezü dang asüngdangyaogo.



FOODISTHAN NH37 ta ser Northeast nung mezüngbuba highway food court ka Deobarnü MasterChef 2023 Nayanjyoti Saikia-i lapoktsüba noksa nung angur. Iba food court ya Jaggan Foodtech Group indang lir aser restaurateur Pranjal Chetia ajanga shisateta lapok. Iba food court ya Assam nung Jaggan group indang mezüngbuba lir aser Azara Airport Road, Guwahati nung Dharapur junction nung lir.

**GOVERNMENT OF NAGALAND  
DIRECTORATE OF TECHNICAL EDUCATION  
NAGALAND : KOHIMA**

NO.DTE/CSAB-NEUT/1/2023

Dated, Kohima the 19th June 2023

**Seat Allocation Schedule for CSAB NEUT-2023**

S.NO	Event	Duration
1	Online provisional Registration and uploading of documents [Engineering, Architecture & Pharmacy]	June 26 (MON) 1000h - July 03 (MON) 1700h, 2023
2	Filling up of choices#	June 27 (TUE) 1000h - July 12 (WED) 1700h, 2023
3	First Round of Seat Allotment	July 18 (TUE), 2023
4	<b>Online reporting (Round 1):</b> Online payment of seat acceptance fee (SAF) of Rs. 4000/- . Exercising willingness options (Float/Slide/Freeze) by the candidates who have been allotted seats against first Round of allotment. Candidates exercising the <b>Freeze</b> option can download Provisional Admission Letter (PAL) and proceed for final admission at allotted Institute as per schedule	July 19 (WED) 1000h - July 24 (MON) 1700h, 2023
5	<b>Second Round of Seat Allotment</b>	July 31 (MON), 2023
6	<b>Online reporting (Round 2):</b> .Online payment of seat acceptance fee (SAF) of Rs. 4,000/- <b>only for the candidates who have been allotted seats for the first time.</b> Candidates can download Provisional Admission Letter (PAL) and proceed for final admission at allotted Institute as per schedule.	Aug 01 (TUE) 1000h - Aug 04 (FRI) 1700h, 2023
7	Seat Withdrawal	Aug 05 (SAT) - Aug 07 (MON), 2023
8	Reporting at the allotted Institute for admission	July 19 (WED) - Aug 07 (MON), 2023

**Note :-**  
\* Registration and Choice filling for Engineering & Architecture will be separate from that of Pharmacy.  
# Candidates will be permitted to fill choices only after successful registration and document verification. Candidates are advised to lock their choices; otherwise the last saved choices will be automatically locked upon reaching the deadline  
\*\* Candidates who have received provisional admission letter after first and second round can proceed for the admission, in case they are not participating in subsequent rounds of counselling. The need not to wait for the CSAB NEUT process to end.  
## Spot round may be conducted by respective DTE/State. Also, separate registration may be required, if conducted.

(Er. VIPULHOU LHOUNGU)  
DIRECTOR

**MULUNGNEN O**



ASO :  
19.2.1965

ASÜ :  
15.6.2023

Tenüngsang Ken 118:19

Temeshiba süngküm kü nem lapokjangma, ajagi ni aitsü,  
aser Kibuba nem tenüngsang agütsütsü.

Onoki teti meima aliba ojala Lt. **Temshijungla Longkümtsür**, W/o. L. Sosangnungba Jamir, shirang tenzükbaba anogo nungi tasünü tashi onok den shirnokisa tamang sarasadem, temeim nüktzü, nübu, shisatsü aser ali rongsen agi yaritepogo, nenok ajak dang kanga pelar-ni ta iba osang ajanga lemsateper. Nenok mapa tajung kodanga mamatsü, Takoksang Tsüngremi mojangma ta ozü tamang sarasadem.

Asür kinunger tenüng nungi,  
Kinungbo aser Chirnurtem.

**Menungra Bilemteter**



Mrs. C. Asangla Jamitsür (Chuchuyimlang)  
Tasüba Anogo : 20.06.2018

Na Kibuba kidangi orr joko tanü küm pungo abensar. Na onok den meliaka nü temeim, tamang sarasadem aser mapa tajungtem bilemteter dang onok temoatsü angur. Na onok den meliaka, item sempettemji chirnur aser kinungbo madak lidakjangma ta sarasadema amonger.

Temeim Kinungbo, Jabaso aser Kinungertem.

**TETUSHI AGÜTSÜR**

Government High school Mangmetong (GHM) 2023 HSLC exam nung 100% passed result anguba aser Directorate of School Education ajanga **Certificate of Merit** agizükba asoshi Mangmetong Officers Forum kanga pelaba lemsateper. GHM ya 2010 küm nung High school upgrade asü aser iba mapang nungi tanü tashi kümshia HSLC result tajung dang ngua arudaki. Tanü tensa asen Nagaland nung government high school-tem HSLC result atema shisabulua aliba mapang GHM-i kümshia result tajung anguba ya kanga tepelatsü aser temoatsü tulu ta bilemer. Iba ya yimer konang atema dang masü saka government school ajak asoshi mulongdangtsü aser tajungshiba asütsü ta yimlar. Ano June 13 anogo 2023 DoSE Award sentong nung certificate agizükba den külemi GHM teacher in charge nem **Best Practises in Schools** video presentation sayutsü maangka agütsü. Iba ajanga nübur aika tangazükba ngur alitsü ta yimlar aser iba asoshi MOF-i School Education Department danga kanga pelaba metetdaksür.

Tsüngremi Government High school Mangmetong teti mojangma!

Mangmetong Officers Forum  
Mangmetong : Nagaland

**Greece nung rong meküpboka asür-tem atema Pakistan nung mang ayim**

**Islamabad, Aami/June 19 (Agencies):** Taoba hopta Greece nung refugee tem mena aliba rong ka tzüyim telungi anemoka aiba sülen Pakistan nung aiba iba lendong nung sür alitsü ta bilemer. Iba dak sendakba nung Hombarnü Pakistan ajunga nung nüburtemi mangyimogo.

Tawa refugee tem mena aliba rongtem lendong tulu ajuruba aika angashia arudar, ajisüaka iba lendong ya ajak rongnung tamajungtiba ka asütsü ta züngshir.

Rong anemoka aiba nungi kümzükertemi ashiba agi, iba rong nung Pakistan nung 400 shi aser iba den Egypt, Syria aser Palestinian nung mena liasü.

Osang ajanga ashiba agi iba angopuba rong nung ya nisung 750 shi mena liasü aser parok Europe-i oya aliba mapang Bodhbarnü Peloponnese peninsula nung tzüyim telungi anemoka ai.

Tang tashi nung nisung 100 shi dang kümzükba lir aser tzüyim nungi tasü mang 78 agitetogo, ta tekümzükba maparen achaayangba ketdangtsürtemi ashi.

Pakistan foreign ministry-i ashiba agi, tekümzükertem rongnung Pakistan nung 12 densema liasü.

International Organization for Migration aser United

Nations refugee agency (UNHCR)-i Honibarnü ashiba agi, rong nung nisung kwi mena liasü iba indang mejangja saka kuli agütsürtem indang osang angadagra, rong nung nisung 400 nungi 705 tashi mena liasü asütsü ta bilemer.

Kasa mapang nung Deobarnü Pakistan Ato Kilonser Shehbaz Sharif-i sangdong ka ajanga Hombarnü linük ajunga nung mang ayimtsü sangdonga liasü. Paisa, iba tatalokba bushisüngdangtsü atema high-level committee ka tentetsü asoshi tetuyuba agütsüogo, ta osang ajanga metetdaksü.

Ketdangtsürtemi nisung shibelenertem terana dak tema puogo. Item nisungtem yagi lisopurtem Pakistan adena tanga tesemi yoktsü atema sen million (dollar meyrjang) aika meshia agir.

Federal Investigation Agency (FIA)-i ashiba agi, parnoki hopta tatemi nisung shibelenba nung densema alitsü ta temulung melemi bilemer nisung asem tashi puogo, kong temulung melemi bilemertem rongnung tongtiba Sajid Mehmood densema lir.

Mehmood ya linük toktsür jena aotsü meranga aliba mapang Hokolbar aonung Karachi airport nung apu, ta FIA ketdangtsür kati Al Jazeera dang meima ashi,

kechiyong osangbenertem den sensaksemtsü atema pa nem temelaba agüja maliasü.

"Iba ya kanga tongtibang jenjang ka agiba lir," ta ketdangtsür yagi ashi.

Pakistan-administered Kashmir nungi ketdangtsür kati ashiba agi, parnoki iba ken o dak sendakba nung tang tashi nung nisung shibelenertem asütsü ta temulung melemi bilemba nisung 10 tashi pua lir.

Iba tesem nung ketdangtsür tejen Chaudhry Shaukat Ali-i Al Jazeera dang ashiba agi, rong anemoka aiba lendong nung samara bushia alirtem rongnung nisung 23 bo Kashmir kübok Kotli district nungi lir.

2023 küm mezüngbuba ita asem nung central Mediterranean nung refugee 400 dak tema arakseta süogo, ta rescue agencies temi metetdaksü.

April ita sangdongba report ka nung UNHCR-i ashiba agi, 2017 küm sülen taküm mezüngbuba quarter nung nisung timtiba süogo.

Iba tesem ya alima nung refugee crossing tem rongnung ajak dang lendong tulutiba aketba crossing ka lir, ta parnokisa ashiba den asürtem ya iba dang nungi timba asütsü akok, kechiyong refugee tem iba tesemi aoba ya ajakbo memetetjem, ta ashi.



## OFFICE OF THE CHIEF ELECTORAL OFFICER

Nagaland : Kohima



No.ELE/CDT-139/2021

Dated: 19th June, 2023

In pursuance of this office Advertisement which was published on 22nd February, 2023, the Office of the Chief Electoral Officer is pleased to declare the results of the Essay writing and Video - making Challenge for the following categories :

A. Selected list of Thirty Best Essays		
(i) HIGH SCHOOL & HIGHER SECONDARY SCHOOL LEVEL		
Sl.No	Name	Name of Institute
1	Kizeiyi Rangkau, Class 10	St. Anthony High School, Tenyiphe -1
2	Angah, Class 9	St. Francis De Sales Hr. Sec School, Medziphema
3	Loneno Rhutso, Class 10	Mezhur Hr. Sec School, Kohima
4	Keneiseno Krose, Class 9	St. Francis De Sales Hr. Sec School, Medziphema
5	Mhayani B Ovung, Class 10	Libemo Memorial Hr. Sec School, Wokha
6	Rongsennaro Kichu, Class 11	Fernwood Hr. Sec School, Kohima
7	Ngipyeh Konyak, Class 10	St. John Hr. Sec School, Aboi
8	Bunuo Rupreo, Class 9	Mezhur Hr. Sec School, Kohima
9	Christina Mannyu, Class 6	Eastwood School, Mon
10	Grace Kez, Class 9	St. Anthony High School, Tenyiphe
11	Wachu Buchem, Class 11	Mezhur Hr. Sec School, Kohima
12	Gracy E. Yanthan, Class 11	Mezhur Hr. Sec School, Kohima
13	Bendangtila, Class 11	St. John Hr. Sec School, Dimapur
14	Pesing L, Class 12	Govt. Hr. Sec School, Thangjam, Tuensang
15	Limasenla, Class 11	Fernwood School, Kohima
(ii) COLLEGE LEVEL		
Sl.No	Name	Name of Institute
1	Neikesano Kuotso, 5 <sup>th</sup> Semester	Patkai Christian College, Dimapur
2	Nungshibenla, 4 <sup>th</sup> Semester	St Josephs' College, Jakhama
3	Toshi Imchen, 4 <sup>th</sup> Semester	Mokokchung College of Teacher Education, Mkg
4	Neigusano Kire, 6 <sup>th</sup> Semester	Kohima Science College, Jotsoma
5	Keviseto Mekro	Kohima Science College, Jotsoma
6	Lideno Kikon, 6 <sup>th</sup> Semester	St Josephs' College, Jakhama
7	Esther Longkumer, 6 <sup>th</sup> Semester	Fazl Ali College, Mokokchung
8	Mazhukho Augustine Saprana, 4 <sup>th</sup> Semester	St. Xavier College, Jalukie
9	Apila S. Sangtam, 2 <sup>nd</sup> Semester	Zisaji Presidency College, Kiphire
10	Yongkhongkhuma Chang, 2 <sup>nd</sup> Semester	Kohima Science College, Jotsoma
11	Zhulika Aye, B.Ed, 4 <sup>th</sup> Semester	Mokokchung College of Teacher Education, Mkg
12	Visasier Hozoyeh, 6 <sup>th</sup> Semester	Dimapur Govt. College, Dimapur
13	Neiputsekho Zhunyu, 2 <sup>nd</sup> Semester	Kohima Science College, Jotsoma
14	Sentinola Longchar, 6 <sup>th</sup> Semester	Japfu Christian College, Kigwema
15	Hitoka, 6 <sup>th</sup> Semester	St. Josephs' College, Jakhama

B. Selected list of Ten Best Videos		
Sl.No	Name	Name of Institute
1	Sokumla M Chang	Kohima Science College, Jotsoma
2	Tech & Art Club	Japfu Christian College, Kigwema
3	Azinliu Newmai	St. Xaviers' College, Jalukie
4	Bambi Dason	Dimapur Govt. College, Dimapur
5	Victoria Zimik	Patkai Christian College, Dimapur
6	Nadia Limarenla	Kohima Science College, Jotsoma
7	T. Weching Konyak	Govt. Hr. Sec School, Naginimora
8	Eastwood School, Mon	Eastwood School, Mon
9	Menelenuo	Herbert Spencer School, Dimapur
10	Meyijungla	Community Education Centre, Dimapur

A total number of 249 Essays and 45 Videos were received for the Challenge from students of schools and colleges all over the State which was held on the topic "My Opinion of Elections in Nagaland". All the entries have been uploaded in the Chief Electoral Office's website: <https://ceo.nagaland.gov.in/>

The awards/ certificates will be issued to the awardees through the respective District Election Officers.

For further information and details, the winners may contact: - 8729990926 / 9856206716 or mail at [ceo\\_nagaland@eci.gov.in](mailto:ceo_nagaland@eci.gov.in)

Sd/-

V. SHASHANK SHEKHAR, IAS.  
Chief Electoral Officer,  
Nagaland: Kohima

## Saisapong nung tetsürtem shilem indang seminar agiogo



**Dimapur, Aami/June 19 (TYO):** National Commission for Women (NCW), New Delhi-i teyari agüja Nagaland State Commission for Women (NSCW), Life Sports Nagaland aser Department of Youth Resource & Sports longjemer June 17 nü Indira Gandhi Sports Academy, Kohima nung saisapong nung tetsürtemshilem dak sendakba nung seminar ka ayongzüka agiogo.

Sentong nung Nyuvitho Nyuthe, Asst Director, Directorate of Youth Resource and Sports-i Sports Policy aser saisapong balala nung tetsürtem atema maongka aliba indang jemi, IG Sports Academy, Alumnus Khrolou T. Mero-i asayar tetsür ka indang otsü

lemsatop, Apila Sangtam, Legal Consultant Nagaland State Commission for Women-i "Awareness on Ethics & Harassment in Sports" onük nung ajemdaker jemi, Dr. Neeta Kumari, Head Coach (Boxing) Khelo India Centre of Excellence, Kohima-i National aser International jenjang nung yimdak yimtsüng nungi asayartem Scope indang lemsatop aser Cüneyi Lohe, Coordinator, Life Sports Nagaland-i Grassroots Sports & Education koda tongtibang iba indang lemsatopa liasü.

Iba sentong nung Indira Gandhi Sports Academy, Kohima nungi kaketshirtem, coach tem aser hostel warden temi shilem agia liasü.

## Prannoy-i anir India nunger asayartem Taipei Open asayatsü



**Aami/June 19, 2023 (Agencies):** HS Prannoy-i anir India nunger asayartem Taipei Open badminton tournament nung asayatsü, koba Mongolbarnü tenzüksü.

World No.9 Prannoy ya iba asayamung nung seed tasembuba asayar lir aser pa mezüngbuba round nung qualifier ka den asayatsü. Iba asayamung ya BWF World Tour Super 300 event ka lir.

Prannoy shibai taoba ita Malaysia Masters Super 300 title benogo, pai Indonesia Open nunga kanga junga asayaogo, ajisüaka semifinals nung pa Denmark nunger world No.1 asayar Viktor Axelsen-i tsükdakja liasü.

Tebur kija asaya nung ano India nunger rongnungi Meiraba Luwang Maisnam, Hong Kong nunger asayar

Angus Ng Ka Long den asayatsü aser Kiran George, Sathish Kumar Karunakaran, Mithun Manjunath aser S Sankar Muthusamy Subramanian nungera asayaba angutsü. Subhankar Dey aser Parupalli Kashyap na qualifiers asayatsü.

Kasa mapang nung tetsür kija asaya nung Saina Nehwal, Malvika Bansod, Aakarshi Kashyap aser Ruthvika Shivani Gadde nunger asayaba angutsü.

Saina mezüngbuba round nung Thailand tsür Pornpicha Choeikeewong den asayatsü aser Malvika third seed asayar Beiwen Zhang den asayatsü.

Tebur tarep asaya nung Satwiksairaj Rankireddy aser Chirag Shetty na Taipei nungbo masayatsü. Tena masayaba mapang Krishna Prasad Garaga aser Vishnuvardhan Goud Panjala na mezüngbuba round nung USA nunger tarep Vinson Chiu aser Joshua Yuan den asayatsü.

Tetsür tarep asaya nung Rutuparna Panda aser Swetaparna Panda na kija asayatsü aser Rohan Kapoor o N Sikki Redd aser Navaneeth Bokka o Priya Konjengbam nunger tarep temeyoktep asaya nung shilem agitsü.

**BILEMDANGANG**  
"Terayi agütsüba nung tepela lir."